

第三十册

卷之第四十二

列女

列女

列女

甘肅通志卷之第四十二

列女

兩河內外風土剛勁婦女知重氣節或盡孝懷忠能
識大義或茹荼畢世殉節崇朝或強暴侵凌捐生蹈
刃自古已多於今更烈深閨卓行固屬可傳蓬戶貞
操尤堪勵俗紀其姓氏彰往勸來博採輿論寧詳毋
畧志列女

臨洮府

晉羊耽妻辛氏字憲英狄道人魏侍中毗之女也聰慧

有才鑒初魏文帝得立爲太子抱毗項曰辛君知我
喜否毗歸告憲英歎曰太子代君主宗廟社稷者代
君不可以不戚主國不可以不懼宜戚而喜何以能
久魏其不昌乎弟敞爲曹爽參軍司馬懿將誅爽閉
城門敞懼問憲英憲英曰事有不可知然以我度之
此舉不過以誅爽耳敞曰然則敞可無出乎曰安可
以不出職守人之大義也爲人執鞭而棄其事不祥
也汝從衆而已敞遂出事定敞嘆曰吾不謀於姊幾
不獲於義鍾會爲征西將軍將滅蜀憲英謂耽從子
祐曰會在事縱恣非持久處下之道吾慮其有他志
也及會將行請其子琇爲參軍憲英曰行矣戒之古
之君子入則致孝於親出則致節於國在職思其所
司在義思其所立不貽父母憂患而已軍旅之間可
以濟者其惟仁恕乎會至蜀果反琇竟全歸辛之識
見類如此

散騎常侍梁緯妻辛氏狄道人緯爲散騎常侍西都
陷沒爲劉曜所害辛氏有殊色曜將取之辛氏據地
大哭仰謂曜曰妾聞女不再醮妾夫已死理無獨全

乞就死地下事舅姑遂號泣不止矐曰貞婦也任之
乃自縊而死矐以禮葬之

隋渭源令裴倫妻柳氏薛舉之亂倫遇害柳氏有二女
及兒婦皆有色柳氏謂曰我輩遭逢禍亂若辱於賊
其若汝父之死義何女婦垂涕曰惟母所命柳氏自
投於井其女婦相繼而下皆死於井中

明曹友妻王氏狄道人友爲廣東瓊山縣丞卒於官一
子復天氏撫育幼孫始終完節洪武中旌表

董守中妻毛氏狄道人毛芾女守中舉賢良任四川
布政司都事卒於官毛聞訃慟哭曰夫死獨存犬豕
弗若吾與俱死遂自縊而死

王紹春妻魏氏狄道人春卒氏年十九其姑尙存有
幼子曰宗道以貧故自負土築夫墳旣葬惟勤紡績
奉姑撫子年七十餘卒永樂中旌表

生員張通妻王氏狄道人年二十六通卒子世安甫
一歲夫亡時卽欲自盡親族止之曰有姑有子何苦
如此乃奉姑撫子備歷艱辛富豪聞其賢欲謀而醮
之氏奮罵以砥霜自隨人莫敢犯守節四十餘年嘉

靖間旌表

魏大信妻任氏狄道人大信病且革任泣告諸親曰
吾必與夫俱死大信卒任自縊以殉

張賓妻王氏臨洮衛人年二十七賓亡無子乃日聞

古有貞烈女吾當效之乃勤紡績以養孀姑取夫侄
以承後嗣有司表之

司偉妻王氏狄道人年十六夫亡舅姑尚存遺腹生

一子誓不再醮勤紡績以治生始終無玷壽六十卒

張銓妻司氏狄道人年二十三而夫亡遺二孤俱在

襁褓司誓無他志甘貧紡績苦節四十餘年撫孤成

立

張紀妻王氏狄道人夫病篤焚香願以身代及

卒哀毀幾絕紡績教子五十餘年卒

文載道妻魏氏狄道人載道赴選卒於京氏年二十

有六遺男來鳳甫七歲貧不能歸襦稱貸於鄉之京

寓者母子徒步扶柩而歸營葬訖勤女紅教子讀書

有司表之

劉澤妻曹氏狄道人年二十澤卒哀痛幾絕竭力襄

事撫孤於舅姑喪葬殫盡心力壽六十有六巡撫表其間

李奉元聘妻張喜英狄道人許字邑人李奉元未娶而沒訃聞父母徃弔英悲痛縊於家巡方上其事奉旨立祠旌表

趙鏗妻滕氏狄道人夫卒卽欲身殉因有姑在及姑亡氏曰姑亡我安忍獨存哭不絕聲飲食不入口浹旬而卒年止二十一

生員張建中妻趙氏狄道人夫死遺一女方在襁褓顧其女曰我無復存之理但爲汝勉活耳遂撫成立及適人饌女畢卽鍵門焚香再拜自縊女發嫁時衣箱已有齊衰一襲始知從前勉活之言非虛也萬曆間旌表

田俊妻尙氏狄道人夫亡時年二十八寡姑垂老家極貧無可依者尙誓死守節勤女工事姑生養死葬悉有禮撫遺孤業儒兼撫夫二侄與子無異

趙鶴齡妻王氏狄道人適趙四年夫亡有惜其年幼勸之嫁者王以死自誓惟孝以事姑慈以撫子守節

三十餘年卒

方瑄妻袁氏狄道人瑄病顛天願以身代瑄卒袁年二十有四水漿不入口哀毀幾絕以翁姑在勉活奉事及撫幼孤未幾亦亡有勸其再醮者袁翦髮杜門撫養夫侄壽六十二而卒

雍不敏妻魏氏狄道人年二十九不敏卒守節撫孤紡績自贍四十餘年巡按表其門

百戶蔣汝勤妻李氏狄道人夫卒氏年二十四遺孤申甫八歲氏甘心奉姑撫子成立襲父職年六十四卒御史表其門

潘榮妻趙氏狄道人榮卒氏甘貧苦節撫子成立襲父職未幾子亦早逝遺婦劉氏年二十有五時有以家事艱難勸之再適者劉叱之曰上有孀母孰與事下有遺孤孰與撫乃守節終身人稱爲兩世雙節云
邢福妻閔氏狄道人福嬰重疾氏脫簪珥迎醫調理及疾革福與之訣令其再適氏誓不易節竭力襄葬鞠二孤至成立孀居五十年壽八十有六卒

王寧妻馮氏狄道人夫亡氏年二十四歲子衡生八

月家無治生具紡績爲資非大故不出戶庭苦節終身

王守山妻魯氏狄道人年二十九山卒誓以死殉家人以撫孤勸乃毀容紡績課子宗舜讀書補郡庠生壽六十有三巡按旌其門

姚登明妻郝氏狄道人年二十四夫亡遺孤二郝哀痛幾殞喪葬畢乃日夜拮据耕織以奉翁姑兼撫二孤及孤長命就外傳時誡之曰予之所以不死者爲姚氏門庭計耳名弗就奚以追休前人未幾長子俊

遊庠廩貢孫之瑄登鄉舉一門衣冠不絕壽九十有七

陳懋妻楊氏狄道人懋卒楊年二十有三遺孤三無戚可依氏號泣卧地姑慰之稍息乃曰夫死矣予無生理如姑衰子幼何乃矢志靡他備嘗艱辛未幾姑亡喪葬如禮季子業儒補弟子員孫膺明經年八十有七卒

生員劉遷妻王氏狄道人明末遷被流寇執不屈而死遺子二尙幼王誓死守節撫養二孤備歷艱辛終

至成立爲邑名士太守表其門

生員甄孺妻韓氏涇源人正德中兵亂執孺及韓氏欲辱之氏大罵不屈遂遇害

張斌妻朱氏涇源人夫亡於京憂泣不食誓欲殉節數日而卒巡按表其閭

徐仁得妻孟氏蘭州人年二十九夫亡遺子思溫甫八歲氏紡績教養由鄉舉任湖廣藍田縣丞思溫復故遺子友諒孟又撫養成立永樂中旌表其門

鍾昇妻邢氏蘭州人年二十九夫亡姑陳氏性至嚴邢承顏順志四十餘年始亡邢以禮葬之享壽八十

九卒

吳彥高妻萬氏蘭州人其姑病劇萬稽首北辰割股作羹以進尋病愈後彥高卒哀毀踰常孀居六十年壽九十三卒

曹洪妻吳氏蘭州人成化間洪商遊蜀病卒時吳年二十七守節甘貧孝事翁姑當道獎之

金鑽妻馮氏蘭州人適鑽四載夫亡馮年二十二遺孤瑞甫月餘馮孝事孀姑撫孤子入庠苦節七十餘

年而終

譚宗良妻梁氏蘭州人于歸二載宗良行商三十餘年不歸別娶生子梁紡績自甘操守不渝良邸卒梁取夫庶子歸家撫養成立內外肅然年六十卒

蔡寧妻子氏蘭州人寧於天順間從征賊刃斷左股輿至家卒母老子幼于紡績以勤孝養孀居五十年鄉人未嘗覩面

郭盛妻相氏蘭州人年二十三夫卒遺子尙幼守節不渝年六十八卒

指揮陳溥妻滕氏蘭州人自幼貞淑寡言笑溥卒滕年少無子女可依孀居自勵素衣蔬食苦節四十年歿

監生李達妻高氏蘭州人達卒高少寡遺孤芝甫四歲孤苦自守時有通媒妁者高斥之遂決意以禮自防教芝成立補郡庠生

黃珍妻楊氏蘭州人年一十七歲許黃珍爲婚未及合蚤珍商遊江南不歸楊父母相繼歿貧苦特甚躬勤紡績不出中門寡言笑以死自誓鄉人服其志越

三十年珍始歸以禮迎娶人皆以完節稱之

高英妻樹氏蘭州人適英七載而英亡時樹年二十七遺孤源四歲守節奉親家貧舅姑屢欲奪其志樹度不能爭乃自白於州司誓死苦守越五十年壽七十有七

監生金志妻劉氏蘭州人夫亡年二十六歲姻戚憫其幼且無出勸令再醮劉終不從奉養舅姑生事死葬竭力盡禮家貧無告依母家四十年卒

滕倫妻宋氏蘭州人年二十四倫亡遺孤連七歲家貧如洗甘心紡績撫孤就學底於成立年八十一弘治間旌表

蔡瑄妻滕氏蘭州人適瑄方五月夫業賈旅卒滕悲痛求死不得卽立志孀居遺孕三月生子諒撫育成立

貢生蘇源妻石氏蘭州人源入監旅卒無子四女俱幼石紡績撫養出嫁三女相繼而亡季女適沈訓者迎養石獨居一小樓如處子然壽七十四而終

義官龔振妻顧氏蘭州人事翁姑以孝聞姑嘗病氏

竭誠顛天割股和藥而疾愈年七十三卒邑人聊讓
銘諸墓極著其孝

趙剛妻戴氏蘭州人年二十而夫亡事姑守志撫子
有成年六十三卒郡人彭澤嘗書雙節以表之

王寧妻馮氏蘭州人夫卒年二十四子衡生一月家
甚貧攻苦撫養充州學生

文晉妻陳氏蘭州人晉以郡吏給由赴京陳從之晉
卒哀毀幾絕其族弟冀托親以歸陳佯許之是夕自
縊死郡人公治棺買地合葬燕邸

吳淑乾女吳氏蘭州人孝愛性生年十四值父疾割
股和藥以進傷重危甚有一老人遺藥敷之患愈不
知老人爲誰後適指揮劉麟

鉛山王繼妃楊氏蘭州人省祭官楊桐女年十六選
鉛山王繼妃未娶王薨矢志守節遂留宮闈撫勝子
如已出巡方吳楷上其事萬曆二十八年建坊旌表
曰貞心天植苦志霜嚴勅封繼妃

高懷義妻陶氏蘭州人年十七而夫亡子女俱無坐
卧一小樓以女紅自養者五十餘年鄉里公鳴當道

肅藩矜其節歲給米薪布帛旌曰完節維風

劉應舉妻高氏蘭州人年二十夫亡並無子女隻身

苦節凡七十年本道獎之壽八十九歲終

生員陸永福妻唐氏蘭州人年二十九夫亡孝事孀

姑教育二子同時遊庠直指具題旌表

庠生楊名顯妻朱氏蘭州人年二十夫亡撫幼子幼

侄恩愛篤至不分異體廵方旌表

戴文光妻楊氏蘭州人夫早歿泣血三年服闋之日

絕飲食自盡肅藩旌表賜祭

肅王嬪楊氏田氏蘭州人明末流寇薄城二嬪盥沐

簪服從容投繯宮人從死者二百餘人

生員楊鴻妻鍾氏金縣人鴻早卒鍾年二十生子二

長三歲次彌月卽欲自盡以舅姑老子勿止之後舅

姑欲奪其志氏痛哭自縊賴侍女救活守節七十年

知縣表其門

生員陳師夔妻邵氏金縣人寡言笑善治家夔卒二

日後縊死於柩前鄉人莫不哀痛

金鰲妻漢氏金縣人于歸二載夫卒氏年二十遺孤

在祿欲以死殉衆慰乃止甘貧撫孤卒年九十萬曆
中表其門

金國宗妻陳氏金縣人夫卒氏年一十八歲寢食俱
廢至七日以首擊柱未死抵暮自縊

吳華妻熊氏河州人華死氏年二十有四遺孤七歲
一貧如洗以死自誓父母不能奪其志乃紡績孝姑
養子守節八十有一而卒正統間旌表

吳昺妻倪氏河州人年二十歲夫死子幼舅姑勸其
再醮誓死守節壽七十有六天順五年旌表

朱顯妻張氏河州人夫死無子氏時年十九舅姑欲
令再醮氏以死誓恪執孝道守節終身天順八年旌
表

張侃妻李氏河州人侃卒氏有姿色父母欲奪其志
氏以藥瞽其一目事舅姑終養撫子女婚嫁壽五十
卒嘉靖間旌表

生員李時郁妻陳氏河州人年二十四生一子一女
夫卒氏次日自縊死

雷玘妻邱氏河州人玘卒邱年三十撫孤守節七十

五卒嘉靖間旌表

生員王約妻李氏河州人年二十七約卒李哀毀幾絕撫孤守節壽六十五卒

徐理妻王氏河州人夫亡氏年二十二姑欲奪其志氏曰姑老子幼何所依恃於是勤織紝事姑教子至七十七卒嘉靖間旌表

王錦繡妻謝氏河州人夫亡氏年二十六甘貧守節年七十有五嘉靖間旌表

指揮姚寧妻金氏河州人寧故金年二十二撫養幼子承襲父職氏苦節終身年八十三卒

姚憲妻雷氏河州人憲寧弟也憲取雷甫一年生子七月憲病篤語氏曰我死之後願養孤子雷聞之哀痛幾死用艾自灸其面杜門守節始終不渝嘉靖三十九年與嫂金氏事聞旌表曰雙節

雷得時妻楊氏河州人得時病故楊年二十四甘貧守節織紝爲事年七十五卒察院給扁旌之

馬廷鳳妻羅氏河州人生男未及週而鳳故氏年二十五屏服飾養幼子四十餘年始終一節事聞旌表

生員劉濂妻周氏河州人濂病故周年二十五歲號泣不絕七日而亡

監生金崑妻黃氏河州人崑故黃年二十遺子朴尙在襁褓黃哀痛幾絕誓不出戶庭撫子成立年七十卒

劉秋喜河州民思信女年十七許義官任璉子國卿未合昏國卿病死秋喜欲往弔之母不允痛哭不食次日平旦整衣裳母不知所爲投井死事聞奉旨旌表給塋田與國卿合葬

朱麟妻李氏河州人生男二夫亡氏年二十八歲母舅欲奪其志於夫死三週日祭畢以二子托之於伯飲藥而亡有司表其門曰節烈維風
捏貞女河州指揮女未嫁而婿亡女遂自縊死有墓在河灘關水渠小橋之北

皇清生員雷從龍妻趙氏狄道人康熙十三年吳逆之變郡城失守氏年方二十遇難以刀自刎未死後從龍故氏二十九歲一子鳴夏甫五歲始年七十四歲氏飲冰茹檠奉姑教子鳴夏後爲貢生

把總周文禮妻沈氏狄道人康熙十八年文禮隨征吳逆至四川陣亡氏年二十九歲遺孤甫二歲氏聞變以死自誓親隣以奉親育子勸乃勉強進食上奉舅姑下撫孤兒凡三十二載

田啟蘭妻趙氏狄道人年二十二歲夫故翁姑俱老長子方三歲次子甫數月氏號哭自縊數次以生母解救方甦家貧紡織度日奉舅姑生養死葬悉盡禮子亦成立年六十有五而終

杜尙智妻寇氏狄道人夫故時年二十七歲姑老子幼家貧姑憐之私議欲令他適氏聞自縊賴救得免誓不再醮研磨賣餅織維紡績爲活計奉姑撫子苦節三十年

盧蔚妻王氏狄道人蔚死氏年二十六歲子甫二歲痛不欲生其姑曉之氏立志守節紡績度日奉姑生養死葬悉盡禮子亦成立苦節凡四十八年

生員牟采妻張氏牟穉妻蘓氏俱狄道人康熙四十四一年兄弟同故時張氏年二十八歲有子名繼祖方二歲蘓氏少張四歲有娠三月張氏謂蘓氏汝若生

男與吾同守後果生男二人遂身親農業協力共濟
繼祖得列庠生蘓氏先卒子亦成立

生員王弘祚妻盧氏狄道人弘祚故氏年二十三歲
子方二歲祖姑年八十餘舅亦衰邁舅姑憐其少艾
欲嫁之氏痛哭自矢守節撫孤孝養祖姑舅姑生死
盡禮年五十四而卒

回民馬有驥繼妻張氏狄道人夫病故氏年二十二
歲前子一氏子一女一氏撫養之誓不再適閱一載
姑以家貧屢次勸嫁氏不從姑暗通媒妁約日令人
偷娶及期氏早起研磨忽聞此信哄前子出縛子女
手足自縊死

程翺妻李氏蘭州人二十九歲喪夫立志守節撫孤
成立壽一百一歲名親族訣別沐浴端坐而逝雍正
三年具題

旌表

百戶范滄妻吳氏蘭州人年二十七滄陣亡吳孕甫
七月後生一子家貧親族勸令再醮氏毀容矢死撫
孤四十餘年

張友科妻駱氏蘭州人科早亡值回變氏攜其婦及已嫁女張氏同投河而沒閤門殉難

生員韓陞寵妻周氏蘭州人年十九寵病卒氏卽絕食母及諸親以氏有遺腹爲勸少進飲食及產弗存氏遂不食死

武舉楊智妻李氏蘭州人守備李必因女智會試北上卒於道櫬將歸先一日氏始知夜半整衣自縊死遂與夫合葬

楊鍾淑妻陳氏蘭州人夫亡氏年十七歲有遺孕後生子倫生孫光甫三歲而倫又亡撫其孫生曾孫先後六十年歷盡危險及耄而卒

周國璧女周烈女蘭州人年十四歲值戊子回變避難東灘爲賊所掠女度不能脫泣向母曰我誓不辱身爲父母羞渡至黃河中流猝躍赴水捧賊俱下賊拉馬尾以出女竟溺死

張希堯妻顏氏蘭州人十九歲適戍者張希堯順治戊子逆回據河州攻城夫中砲而亡顏聞痛哭自縊生員王學文妻韓氏蘭州人戊子回變文被害氏聞

卽日自縊其翁收尸合葬焉遺子譽甫四歲

生員方策妻陳氏蘭州人年二十六策亡家貧苦守凍餒自甘後三子俱歿撫幼孫五十餘年壽七十八而卒

于養鯤妻陳氏蘭州人年十九歲適鯤甫四年鯤病卒氏水不下咽者三日一夕自縊柩旁

王三問妻張氏蘭州人年二十二夫故氏對屍泣曰俟我同去是日暮潛投黃河死

王承禮妻周氏蘭州人年二十喪夫子甫三歲家貧苦節自守其後子亡撫孫年九十卒

孔啟忠妻楊氏蘭州人夫早亡伯叔勒嫁氏撫孤無二志後復遭族人逼氏慮不能遂志遂自縊死

翟麒妻王氏渭源人麒早亡氏年十九歲有遺孕生子氏上事舅姑下撫弱息歷十六年子芾遊庠舅姑以壽終

張善猷妻張氏渭源人夫早亡氏敬奉孀姑畊織經營每食粗糲自養甘旨供姑黽勉二十餘年及姑亡竭力葬祭皆有禮

周弘祚妻安氏金縣人十八歲于歸又六年而夫亡上奉翁姑下撫幼子守節五十一年雍正十年具題

旌表

生員王顯猷妻陳氏金縣人夫故氏二十一歲無子猷弟顯謨有子三人氏求一子立嗣矢志守節歷數載嗣子亦亡氏志堅金石又向叔求將次子承繼撫養成立

楊兆奎妻梁氏河州人奎亡遺孤二歲氏年二十二矢志守節葬夫後卽持家事一切不以累舅姑舅姑或感傷則抱遺孤以解之以是舅姑感悅俱以壽終王起鳳妻王氏河州人鳳卒氏年二十八撫孤成立事舅姑始終一節

韓萬才妻辛氏河州人家貧無子氏夫疾藥餌湯粥典賣什物供給及夫病故氏卽于是日投井死時年三十歲

柴門興妻吳氏河州人門興爲東房吏迎新刺史至華陰道上中暑斃氏聞訃晝夜哭不食者數日女伴勸諭遂少食強起脫簪珥衣物作搬柩計至九月櫬

歸停山莊是夜氏卽縊死柩前

賈興祖妻朱氏河州人生子麟甫三歲次子僅一月氏年十九守節撫二孤日夜飲泣麟入泮次子亦成立

生員朱衡妻楊氏河州人衡卒氏二十九歲欲以身殉親姻以撫孤勸乃勉事姑嫜教育二子後二子同時入泮孫入泮者三人享壽八十四歲

王大元妻何氏河州人元病故氏年二十五歲矢志不茹葷酒不御環珥惟閉戶教子三子皆得成立享年八十而卒

鞏昌府

魏姜叙母楊氏冀人楊阜之姑叙爲撫夷將軍屯歷城
寨建安中馬超攻冀殺刺史韋康阜至歷城候叙母
具言冀中事歔歔悲甚母慨然謂叙曰韋使君遇難
豈一州之恥亦汝之負汝無顧我人誰不死死死國忠
義之大者但當速發我自爲汝當之不以餘年累汝
也因勅叙與阜參議阜乃與趙昂梁寬等合謀舉兵
攻超超自出攻叙寬等閉冀門超失據因進至歷城
執叙母母怒罵超遂殺叙母及其子而去阜上狀魏

王手令褒揚

趙昂妻王氏名異天水人昂爲羗道令留異在西會同郡梁雙反攻破西城害異二子異獨與六歲女英在城中異見二子已死引刀欲自刎顧笑曰爾當誰恃哉乃以溷糞涅麻而被之黓食瘠形自春至冬異竟免昂遣迎之未至三十里止謂英曰婦人無符信保傳不出房帷吾遭亂不能死惟憐汝耳今官舍已近吾去汝死矣遂飲毒而絕適有解毒藥灌之得甦建安中昂以參軍徙居冀會馬超攻冀異躬著布鞞

佐昂守備又悉脫所佩環纁以賞戰士超攻急刺史韋康與超和超害康劫昂質其子月以要昂超妻楊聞異節行請與譙終日遂重相結昂得免于禍及昂與楊阜等結謀討超告異曰當奈月何異厲聲應曰忠義立於身雪君父之大恥喪元不足爲重况一子哉遂共閉門逐超超奔漢中從張魯得兵還異復與昂保祁山超圍三十日救到乃解超卒殺異子月自冀城之難至祁山昂出九竒異輒參焉

晉李暘妻尹氏天水冀人幼而好學才辨有氣節暘之

創業謀謨經畧毗贊爲多

齊畧陽垣曇深妻鄭氏字獻英滎陽人劉楷爲交州辟曇深同行未至而卒時鄭年二十子文凝始生仍隨楷到鎮晝夜紡織旁無親援年盛美自厲冰操無敢望其門者居一年私裝盡乃告楷求還楷愴然許之厚爲之送於是間關危險至鄉葬畢親教文凝經禮訓以義方

元張忠妻劉氏伏羗人忠亡劉年二十守節終身至元二年旌表

明百戶王璵妻石氏鞏昌人璵卒石誓不二適奉舅孀撫幼子終身無失

百戶汪溶妻白氏鞏昌衛人溶卒白年二十有七蓬髮垢面晝織夜紝以鞠孤鐸鐸長能孝以奉節母

指揮趙誥妻閻氏鞏昌衛人誥卒閻年二十七三日不食欲以死殉縊將絕家人救之甦諭曰殉夫固高節柰二孤弱小將誰依因絕迹人事撫孤成立雖至親不能見一面

百戶胡鑑妻韓氏鞏昌衛人鑑卒子方七歲茹苦守

節鄉人稱之

指揮閆橘妻陸氏鞏昌衛人橘亡陸年二十有五誓以死殉人謹防之不果守志六十五年未嘗見其踰戶

指揮汪川妻張氏鞏昌衛人川故張年十六奉養孀姑撫子成立守志五十餘年

王愛妻朱氏鞏昌衛人朱年二十八而愛卒茹苦守節

生員王彤妻李氏鞏昌衛人彤亡氏年二十四歲誓不欲生一日縊于室家人覺而救之他日送母喪歸縊于室郡守與衛守聞而弔之

指揮汪福妻葛氏鞏昌衛人年十九福亡孝事舅姑誓不再適舅姑歿葬祭盡禮詔旌表其門

指揮董諒妻雷氏鞏昌衛人諒早卒誓不再適遺腹一子撫育成立襲父職以功陞都指揮詔旌其門

米烈女名鳳安定人米金女年十七許聘王生而未歸王卒鳳欲往弔父母不許乘間至王生柩所慟哭而返遂自縊宣德間旌表

王廷貞妻郭氏名二英安定人正德中寇亂破堡欲
污之二英大罵披其頰寇刺其兩目而死

生員王經妻方氏安定人經遇寇被害方氏聞之號
慟投崖死時年二十四

趙全妻張氏安定人全墜馬死張至死所欲投崖親
黨防之不果遂自縊

賈時宜妻張氏安定人賈客死于淮張年二十有六
痛夫客死偕女伴扶櫬歸里孀居四十年邑令表其
事

楊璿妻郭氏名順英安定人璿卒英年二十舅姑早
喪守寡撫孤孀居六十年年八十終

監生王應槐妻張氏安定人夫死遺妾二子幼有白
金六百張埋之甚密及二子長有室乃集親黨出金
均畀曰吾事畢矣年八十一終

生員張嘉相妻李氏安定人年二十四相客死于外
遺子襁褓慟哭欲絕舅姑憐之撫子哀以文行知名
事聞旌表

王虞封妻劉氏安定人年二十三封歿生子烈方兩

月劉毅然守節烈後成立萬曆中旌表

張某妻薛氏安定人年十七夫歿子勲始生氏撫育成立爲諸生有聲有司上其事旌表

王某妻南氏安定人夫歿南年十九誕子方三月足不踰閭垢面蓬髮守節六十餘年

梢藻妻石氏安定人藻亡氏年二十一歲遺子方三歲水漿不入口欲從夫地下戚黨諭以翁老孤幼廼弗死終養無闕儀子凌雲亦讀書成立巡方表之

生員陳周典妻張氏安定人年二十夫歿子炳方在抱矢志求死自縊者數自是數十年語不謔笑容不膏沐

杜時茂妻安氏安定人年二十一夫歿守志自矢嚙指血誓之撫二子成立縣令上其事旌表闖賊破城聞而義之一門免禍年七十七終

生員李培妻楊氏安定人歸培僅朞年培歿年始十七誕遺腹子氏撫之舅姑每欲奪其志氏終不渝子如松癸未冬賊殺如松妻傅氏罵賊不受辱與夫同死

康汝善妻陳氏安定人年二十五夫故氏守節子姓繁衍知縣應昌士上其事旌表

生員賈學誼妻安氏安定人夫死殮畢密行縊死帷側

舉人景彥和妻陳氏安定人彥和卒陳年二十三矢死守節侍舅姑動循禮度孀處六十年卒

生員張大器妻李氏安定人大器亡氏痛哭不食七日而殂

李珩妻禮氏安定人珩亡氏自縊而死

張大韶母杜氏安定人闖賊陷西安杜先期數日不食及城破杜義不受辱觸堦而死

貢生張國鉉妻楊氏安定人崇禎十六年冬賊賀錦攻安定城急鉉與里紳劉耀龍議丁壯禦賊女子運石接濟楊與劉之婦首運石闖闖女子因共運石及城陷楊抱石死于壕事定家人跡獲屍兩手猶抱石不脫生員張國維妻安氏張國頴妻彭氏俱以運石擊賊死于賊手

石傳璽妻張氏安定人癸未闖賊尅城掠張至兄大

韶家纒其首死于窗櫺之下時年三十餘

生員楊清妻王氏王三爵妻謝氏楊復堦妻石氏安定人俱從夫自縊廵方命建祠東關

生員李鶴妻郭氏通渭人鶴邁疾不起氏憑尸悲號氣絕者三家人防少懈乃付其女于伯氏梳櫛整容蒙被而卧以綾帕繫頸家人救蕪蒙袂覆面不復食越三日而歿年二十有五時嘉靖丁未

生員楊必暢妻王氏通渭人必暢死氏年甫二十日夜號泣不食而死

劉大俊妻金氏通渭人年十六適俊甫三載俊病風痺甚浴於邑溫泉遇暴風雨山水陡發不能動氏在傍扶俊俊使急走氏號泣堅持不肯去與夫並溺死屍流數里兩屍始出氏猶挽夫不釋以微窶無後湮滅二十餘年萬曆四十二年知縣劉世綸上其事廵按彙題旌表

宋榮妻張氏伏羗人夫卒氏年二十有九守節終身弘治中奉旨旌表

謝子顯妻張氏伏羗人夫卒氏年二十有七守節終

身弘治中旌表 按縣志二氏俱經歷張珏之女珏妻王氏性嚴謹有家範故二女同節悉蒙旌表

會寧縣丞彭珏妻王氏河南鄆陵人正德七年二月珏解糧入京會流賊破城突入縣衙欲擄氏去氏大罵曰犬賊何敢污我衣冠家賊怒斧破其腦死事聞旌表

任琦妻王氏寧遠人琦卒氏年二十守節撫孤上聞旌表

生員周溥妻張氏寧遠人溥卒氏二十三誓死不二守節五十年勅賜旌表

訓導魏文訓妻韓氏通渭人夫卒于官氏年二十五扶柩攜幼男還鄉甘貧守節訓子成立任撫寧衛經歷年八十五卒

李辰妻趙氏通渭人年二十夫卒氏方孕欲死以殉勺水不入者數日諸親苦勸始進饘粥後舉子貧甚備嘗艱辛撫子成立巡按表其門

生員吳秉禮妻賈氏通渭人秉禮卒氏年二十餘守節撫孤雖內閫亦不輕出終日不舉火亦不向隣覓

取二子俱成立鄉人高之知縣劉世綸因公舉旌表廩生王大賓妻馮氏會寧人年十七歸賓逾歲賓亡氏哭泣不食求死家人防之甚密越旬餘稍懈就靈帷前縊死有司旌匾

生員陳嘉賓聘妻張烈女名招姐會寧人幼聘于靖遠衛生員陳嘉賓既而賓家甚貧值歲饑餓死女聞之痛哭三日不食其母叱詈之居頃有鄉人約其父母趨避以馬迎強娶之女持刀堅拒娶者懼策馬而回父母還責罵之女遂自縊

何烈女名武英伏羗人何景元女也母早喪事父至孝嘉靖甲午流賊作亂入其家欲污之武英怒罵力拒賊遂刺武英方刺時忽黃犬從傍嚙賊右股拽七八步鄰人楊景和聞喊恃勇赴救賊並景和與犬撲殺之邑人爲立烈女祠

舉人楊安妻賈氏伏羗人安卒賈年尙少守節堅苦年七十有七始卒安子景陞妻趙氏陞卒趙年二十二歲以死自誓事姑賈曲謹終身無間言景陞子俊妻任氏俊亦早卒任年二十五守節不二俊子時濟

妻康氏濟亦早卒康年二十二姑媳甘貧伶仃孤苦
楊氏一門四世栢節鄉人景仰旌典未及

鄭得時妻呂氏伏羗人夫死翁姑欲嫁之呂氏負幼
女投水而亡

生員王加鼎妻王氏伏羗人夫亡悲哭淚乾繼之以
血因而喪明

生員魏成謨妻李氏伏羗人夫早亡哀毀成疾未及
兩月亦死

生員盧瀛妻李氏伏羗人夫早亡時李年二十五保
恤二孤事姑至九十餘始終如一

張震妻王氏伏羗人自二十歲守節壽至六十撫前
妻之孤視如己子始終無二

黃栢妻馮氏伏羗人少年守節撫侄爲子至于成立
馮以壽終

生員蒲輪妻楊氏伏羗人夫卒無子誓不改適孀居
五十年清苦終身

李萱妻王氏伏羗人萱卒無子守節年幼至老不改
涿州同知馮雲龍妻黃氏伏羗人早年守節賢聲茂

著

瀘州同知鞏養重妻杜氏伏羗人孀居三十餘年撫子成立清苦自持

蔣毅妻李氏伏羗人夫亡堅志守節以養舅姑享年八十五卒

盧志會妻安氏伏羗人合巹甫三月會卒安年十九誓死與夫同穴家人防之不果後守節六十二年

王本義妻趙氏伏羗人夫亡趙年二十有二甘貧守節晝夜號泣絕而甦者三族人救之始得不死後六

十九而卒

陳嘉諫妻武氏伏羗人孀居從子者殆五十年足不履門鄉人頌之

周某妻謝氏寧遠人夫亡氏年二十有六父母欲其別適氏曰遺腹在身何忍言此紡績自給不復至母家苦節五十餘年事聞旌表

西和知縣耿桂芳子婦王氏嚴氏女五姐蠡縣人家婦王次婦嚴與女五姐皆殊色崇禎八年賊夜破城三人懼爲所辱同室縊死明日賊首搖天動見之亦

爲嘆惜邑人莫不高其節

生員張斗南妻張氏西和人年二十一流賊入城逼之行氏義不受辱給賊前行率二子甲寅庚午投火焚死羣賊駭散

王繼忠妻李氏西和人年二十四夫亡母姚孀居病垂危李傷母痛夫遂飲藥死

田烈女靖遠人許字生員張廷表未娶廷表卒女悲泣奔喪父母阻焉抑鬱不食而死

申大亨妻楊氏岷州人家極貧夫邁疾不能供湯藥氏以裙覆其夫乞米于隣及歸而夫已亡氏痛哭仆地卽死知州李儁表其門

蕭正遺妻李氏洮州衛人明末流寇遍野氏少有姿色奔逃入山遇賊逼之氏持斧砍殺其賊乃被賊害千總劉三樂妻張氏西固所人天啓八年三樂故氏年甫十八欲以身殉或勸之曰幸有遺腹安忍盡節而絕夫後越七日果生一子命名弘聲撫育成立仍掌西固所邱務題請旌表

皇清駱元圖妻包氏隴西人年二十九夫故遺孤三人氏

矢志撫孤遭荒典鬻度日長伯二伯相繼逝二婦亦皆去帷悉竭力如禮殯葬教誨諸孤以至成立雍正七年具題

旌表

李炳妻陳氏隴西人年二十一夫故僅遺一女矢志奉養翁姑家貧勤女工以易薪米翁姑亡喪葬盡禮伯嫂繼逝遺孤週歲氏撫至成立無異已子鄉隣皆稱孝慈雍正七年具題

旌表

杜曉妻石氏隴西人年二十一夫亡以奉翁姑育弱子自任翁司訓興安未幾卒氏攜孤兒廷璋跋涉千里扶櫬歸葬氏拮据課子爲庠生守節五十五年雍正七年具題

旌表

生員景俊妻張氏隴西人性孝姑王氏患背疽氏吮膿中毒幾絕復甦年二十九夫亡誓以身殉如姪勸之撫孤以延夫脉孤學聖成立娶媳王氏景學聖妻王氏年二十五歲學聖又亡姑媳相依一

門雙節張年登八十苦守五十餘年王亦三十餘年
雍正七年具題

旌表

劉俊妻馬氏隴西人夫故氏年二十七矢志養姑撫
子子亦入庠雍正七年具題

旌表

張雄妻宋氏隴西人年二十七夫死遂引刀斷髮誓
不改醮遺孤大經甫四歲家貧撫子守節四十餘年
雍正八年具題

旌表

劉斌妻趙氏隴西人二十三歲喪夫孝事翁姑生養
死葬盡禮事夫叔如翁撫夫九歲幼弟及長代爲婚
娶氏有遺腹一子教育成立守節三十五年雍正十
年具題

旌表

石盤妻郭氏隴西人年十八夫亡遺孤未滿三月氏
事翁姑育幼子守節四十五年雍正十年具題

旌表

守備楊承綬妻司氏四川潼川州人夫承綬休致回
岷州病故氏年二十一歲守節撫孤四十三年雍正
十年具題

旌表

李中梅妾張氏隴西人氏事夫與嫡室俱小心盡禮
中梅亡氏年二十五歲嫡室楊氏亦故嫡子甫三歲
氏愛如已出養而兼教歷三十餘年如一日雍正十
年具題

旌表

杜暢盛妻周氏隴西人年二十四夫亡上事翁姑下
撫子女孝慈勤儉守節三十一年雍正十年具題

旌表

楊興妻趙氏隴西人夫亡翁姑老孤子幼氏守節三
十餘年備嘗艱苦雍正十年具題

旌表

彭天修妻王氏隴西人年二十六歲夫亡之後翁姑
繼歿喪葬盡禮教訓孤子守節三十餘年雍正十年

旌表

李大綸妻楊氏隴西人年二十五歲夫歿翁姑繼亡
喪葬俱竭力盡禮家貧紡績度日苦節四十餘年雍
正十年具題

旌表

李璉妻孫氏隴西人年二十七歲夫亡氏事姑育子
晝耕夜績矢志苦守已三十四年雍正十年具題

旌表

生員趙之英妻王氏隴西人英故王年二十五歲三
日不食自縊殉夫

鄧楫妻嚴氏隴西人楫亡遺孤良材六歲氏年二十
有二守志不渝養親撫孤良材爲邑庠生無何亦故
遺孤彩氏復撫之婚娶生子鄧氏得延一脉

生員羅在堂妻馬氏隴西人在堂逝世翁撫孤以孝
慈稱康熙十四年吳逆叛僞將陳元經等竊據隴西
搜括士民氏留子萬錦於翁側攜媳李氏女瑞蘭避
居斗底山六月賊至氏手挽媳女墜崖下死同時避
亂山中者有貢生陳文言媳陳氏邑增生李國祥妻
史氏郡庠生王家駒妻謝氏女二姐聞氏死亦墜崖

死

生員張傑妻李氏隴西人傑爲賊殺掠其婦送紅旗白四氏好言哄四他出及歸而氏已自縊

生員董鎮妻杜氏隴西人年十六歸鎮二十二歲夫亡翁老子幼家貧矢志守節

張嶠妻楊氏名慕潔安定人嶠死氏年二十四有遺腹及生男痛絕復甦親操井臼事舅至九十餘孤之翰爲庠生雍正十年具題

旌表

岳存虎妻王氏安定人年二十一歲夫於康熙二十年五月初六日病故氏號慟終日於初七日自縊柩前康熙二十一年具題

旌表

高必達妻袁氏安定人十四歲適高未踰月高遠遊雲貴氏竭力孝養其姑姑歿夫亦客死於外氏慟哭投繯家人救之得甦誓不復醮苦守五十餘年張嵐妻蘓氏安定人年十九夫死以女工給菽水事始終身

生員陳鵬翔妻曹氏安定人年二十三夫亡有遺娠母家欲奪其志氏決意不從數月後生子躬親女作教子以嚴子晨遂入泮以壽終

卜元吉妻高氏安定人夫亡年二十三舅欲嫁之聘者至門氏卽翦髮擲地掣其耳環血淋漓滿頰姑素賢相抱而泣少頃高給入廁急趨投崖鄉鄰救之得免

安汝衡妻張氏安定人夫死年二十二水漿不入口者十餘日家人勸以撫孤大義始漸食後備歷艱辛訓子成立

王延壽妻左氏安定人夫歿時年二十三歲上事翁姑撫育幼子克盡婦道三十年如一日雍正十年

旌表

生員王心一妻陳氏安定人年二十六夫故哀毀不欲生姑老子幼歷盡艱辛事姑終身子亦成立

趙之璧妻魏氏安定人氏有殊色夫久病遂茹面蓬頭家貧無子賣屋密具二棺不使夫知夫死之夜遂自縊親友義而並葬焉

會寧縣典史汪玉虹妻陳氏隨夫在任康熙十四年
玉虹赴南安陳氏竭力事姑既而姑歿陳氏獨守靈
幃六月逆賊破城賊兵入署百般拷打氏罵賊不屈
遂投井而亡本年十二月具題建坊

旌表

高近明妻何氏會寧人近明貧苦夫妻子女雇工於
東嶽廟僧甯應貞康熙四十三年十一月十三日應
貞強姦何氏不從將何氏中衣扯破氏罵詈奔出白
知近明欲行控告至十二月二十七日又求行姦氏
復拒罵和尚持棒擊氏氏女見母被毆用斧救護和
尚奪斧砍死又入室砍傷何氏至次年正月初八日
殞命和尚擬斬何氏殞身全節不受污辱康熙四十
四年具題

旌表

王有君妻王氏會寧人有君出外賣柴未回有王守
本夙羨王氏少艾潛入卧室強逼求通王氏不從趕
罵守本慮人知遂拔塲門所植之椽連擊王氏頂心
殞命王氏村莊少婦舍生殉節不爲強暴所污康熙

三十七年具題

旌表

柳懋倫妻王氏會寧人懋倫病亡氏撫屍悲慟絕粒不食晝夜求死家人防甚力越三日含殮畢是夜遂以白練自經靈前

生員吳友古妻王氏會寧人夫亡遺孤甫三歲氏年二十有一課子成立苦節五十年

王琮妻尙氏會寧人夫亡氏年二十五遺子二齡事翁姑以孝慈著聞守節六十餘年

趙國璧妻王氏會寧人氏年二十三夫亡艱苦育子子入泮

童生丁居南妻吳氏會寧人年二十五夫故遺孤丁中俊甫六月家貧立志守節教子中俊入泮年七十餘

丁建南妻康氏會寧人建南故氏年二十一翁老子幼守節歷五十年

吳禹鼎妻梁氏會寧人夫故時氏年十九遺腹生子苦守成立

古肅通志 卷四十三 三
梁任弘妻李氏會寧人年二十夫亡無子撫侄若已
出鄰邑富室欲以百金奪其節氏聞之遂攜子獨居
困饑寒者歷四十年

王佐妻武氏會寧人佐死氏年十八歲舅姑老遺子
穉家甚貧與弟輔同炊未幾輔夫妻亦亡遺孤亦在
襁褓氏拮据盡瘁奉親鞠孤子侄成立苦節四十餘
年

生員吳其藥妻李氏會寧人逆寇破城家人奔竄氏
以弱質懷七月孕賊至恐辱自投井中時年十七歲
武體泰妻杜氏會寧人于歸時方十四齡夫貧甚或
採薪拾茶婦必隨之不少離夫死氏易櫬含殮撫棺
而哭遂閉戶自經死

趙福祿妻栗氏通渭人福祿病亟遂絕粒不食及卒
氏號慟三朝隨柩出乘間投崖而死

學生王憲妻侯氏寧遠人憲亡氏年二十二子方四
歲家最貧氏拮据奉舅教子有成

郭材妻王氏寧遠人年二十餘而寡子才五歲撫之
成立年八十四而終

學生張熙妻李氏年二十一夫亡遺子燦斗始在襁
褓拮据井臼燦斗長隸學宮鄉隣感嘆議將聞於當
事氏知力辭年七十餘

生員孔嗣昌妻董氏寧遠人昌早亡遺子甫二歲家
計蕭條父母勸之改適氏堅不從

魏烈女寧遠民魏有祿女生長田間年十七有姿色
父早亡獨母相伴家貧康熙三十四年七月間同里
奸民窺其母他往直入室逼之女怒罵不從隣里聞
女喧呼聲往瞰其人倉皇逸去女已自刎於室

王麻狗妻呂氏寧遠人年及笄歸麻狗康熙四十八
年七月間生一女甫數日麻狗病亡痛哭自投於地
值家人皆往送葬呂以新產獨留遂縊於室時年十
九

任濟民妻郭氏伏羗人濟民故氏年十八抱屍號慟
遂自縊死

舉人鞏敬緝妻蒲氏秦州人適伏羗縣舉人鞏敬緝
翰林鞏建豐之長子雍正四年冬建豐督學滇南敬
緝隨之任道卒訃至氏一慟氣絕妯娌撫慰誓不獨

生乃奮身墜樓不死手足俱折家人防圍甚嚴乘間投繯自盡

生員楊蒙妻樊氏漳縣人夫亡年二十四遺子僅週歲撫棺悲悼欲以身殉親屬勸撫孤成立以至入泮守節四十餘年雍正十年具題

旌表

生員李定世妻趙氏漳縣人事翁姑生養死葬備極誠敬年二十八夫故遺孤八歲孑孑獨立教子遊庠守節四十二年雍正十年具題

旌表

生員楊孚妻李氏漳縣人二十歲夫亡遺子三氏立志守節女工度日艱辛萬狀三十餘年人無間言生員汪漢宗妻包氏漳縣人年二十六夫亡遺子二長七歲幼五歲又孤侄甫十歲矢志撫育甘貧茹苦三子成立

王氏漳縣庠生趙世基母氏夫故年二十七歲世基方八歲氏矢志守節誨子讀書冬月燈火弗繼氏拾乾糞煨火令以香頭映字卒列學宮

生員侯天錫妻杜氏靖遠人順治四年年二十七天錫亡號痛幾絕遺孤三子俱幼家貧立志守節閱四十餘年如一日康熙三十二年題請

旌表

馬海妻楊氏靖遠人年二十海亡氏悲號絕粒自縊而死康熙十年具題

旌表

陳啓堯妻王氏靖遠人康熙二十四年夫亡王氏年三十一歲引刀自刎家人救解得生復吞金簪頭不死日夜號泣絕食家人勸解隄防復自縊救解堯葬後二日防範稍疎遂縊死康熙二十六年具題

旌表

副將趙率倫妻王氏靖遠人總兵光瑞之繼母年十六歸夫光瑞甫三齡撫育若已出至二十七歲率倫故守節撫子年七十三以子光瑞受封

路守愈妻陳氏靖遠人年二十七夫亡家貧晝夜績紡以奉雙親喪葬俱如禮教子屆遠讀書時值饑饉氏自咽糠粃以好食食子後氏面浮腫屆遠疑每食

必欲與母俱母誑使先食屈遠堅不獨食氏遂泣下
母子相抱而泣後屈遠爲監生曲盡孝道

生員盧潢妻張氏靖遠人年二十三夫亡苦志守節
年七十八終

鄭治安妻席氏靖遠人年二十七夫亡守節事親遺
腹生男撫之成立孝慈兼全

馬興妻馮氏靖遠人年二十二夫亡遺一子苦志撫
孤孝養翁姑子年三十又亡孫僅八齡氏復撫育成
人卒年八十餘

張成妻占氏靖遠人成亡時氏年十九生子僅三月
苦志撫孤孝養翁姑

韓有德妻楊氏靖遠人年二十夫死苦節奉姑遺子
二歲撫至成立

王天水妻張氏靖遠人年十八夫亡遺孤週歲家貧
苦守撫子成立

杜槐妻劉氏靖遠人夫死氏年二十八遺腹生一子
芝蘅立志撫孤事翁姑以孝聞

張家妻王氏靖遠人年二十而家夭舅老失明奉侍

維謹沒則苴麻盡哀撫孤茹苦

陳文耀妻張氏靖遠人夫亡氏年二十三事翁與繼姑敬養交至及終葬祭以禮

武舉趙率泰妻葉氏靖遠人泰亡氏二十九歲無子撫侄光璧以延泰祀苦節五十餘年

路寅妻郭氏靖遠人事翁姑孝謹家貧菽水不繼年二十六夫亡四日卽絕粒投繯以死

韓育惠妻黑氏靖遠人夫死年二十三遺子甚幼氏傭績以哺孤兒方至成立

營兵楊暢茂妻展氏靖遠人暢征川陣亡氏時年二十八苦節撫孤

傅良棟妻左氏靖遠人年二十七夫亡奉養舅姑喪祭盡禮教子光俊入泮

王德元妻劉氏靖遠人年二十三夫故遺孤道昌撫教完娶道昌復早逝遺孫五人鞠育成入氏年百有二歲曾孫林立

營兵李國昺妻張氏靖遠人昺陣亡氏年十九甘守苦節事養翁姑殯葬以禮撫二子成立享年七十有

一
豆生桂妻陳氏靖遠人夫死氏年二十一二子俱幼
貧無所倚撚毛線度活二子俱成立

劉爵妻馬氏靖遠人爵征川陣亡氏年十八並無子
女甘貧苦節女工自給

呂元聲妻王氏岷州人夫亡年二十七歲家貧矢志
守節養翁姑撫孤兒歷四十五年雍正十年具題

旌表

楊桂齡妻閔氏岷州人二十四歲夫故無子止有一
女氏斷髮誓守針指自給撫育弱女成人婚嫁守節
五十八年雍正十年具題

旌表

生員徐永清妻虎氏岷州人年二十三而寡苦節四
十年撫孤成立
楊佳棟妻張氏岷州人年二十四夫亡苦節四十餘
年撫孤成立

徐添順妻陳氏岷州人添順以牆崩壓死氏痛哭三
晝夜勺水不入口誓欲從夫地下家人防之稍踈遂

自縊死

王旦名妻周氏洮州衛人年二十三歲夫故遺孤承堯未周歲氏苦節撫子及長性至孝飲食起居必親焉氏壽一百一十三歲承堯九十歲人以爲節孝壽考並出一門

馬體元妻張氏洮州衛人年二十一歲夫亡遺孤甫周歲家極貧無翁姑兄弟族之伯叔逼之改嫁氏誓死不從以針指撫孤成立以壽終

劉世華母談氏西固人夫在日賠納屯糧十餘石夫亡年始二十遺孤始生志勵冰霜身任耕織招佃墾田糧無賠累家漸饒裕遺子成立壽八十有奇

平涼府

後漢皇甫規妻安定人不知何氏女妻善屬文能草書
時爲規答書記衆人怪其工及規卒時妻年猶盛而
容色美後董卓爲相國承其名娉以駟輜百乘馬二
十匹奴婢錢帛充路妻乃輕服詣卓門跪自陳請辭
甚酸愴卓使傅奴侍者悉拔刃圍之而謂曰孤之威
教欲令四海風靡何有不行於一婦人乎妻知不免
乃立罵卓曰君羌胡之種毒害天下猶未足耶妾之
先人清德奕世皇甫氏文武上才爲漢忠臣君親非

其趣使走吏乎敢欲行非禮於爾君夫人耶卓乃引車庭中以其頭懸輓鞭撲交下妻謂持杖者曰何不重乎速盡爲惠遂死車下後人圖畫號曰禮宗云

北魏貞女兕先氏涇州女許彭老生爲妻聘幣旣畢未及成禮兕先率行貞淑常自舂汲以養父母老生輒往逼之女曰與君禮命雖畢二門多故未及相見何由不稟命父母擅見陵辱若苟行非禮正可身死耳遂不肯從老生怒而刺殺之取其衣服臨死謂老生曰我所以執節自固者正欲奉給君耳今反爲君所殺若魂靈有知自當相報言終而絕老生持女珠璣至其叔宅以告叔叔曰此是汝婦奈何殺之天不祐汝遂執送官太和七年有司劾以死罪詔曰老生不仁侵陵貞淑便可戮之女守禮履節沒身不改宜賜美名以顯風操其標墓旌善號曰貞女

明指揮僉事甘忠妾彭氏平涼衛人正統八年忠死氏哀戚不絕自縊於室事聞旌表

張經妻劉氏華亭縣人有二子平康德隆女春姐正德十年虜入寇掠劉氏及春姐執赴北驅以刃氏及

女咸大罵承刃死之後二子俱仕

魯烈女涇州人年二十嘉靖元年春寇掠婦女皆脅以從氏獨冒刃罵賊而死巡按俞茂堅立碑表其墓趙廷璧妻彭氏平涼縣人年二十三生子雲漢卽寡剪髮納於壁棺雲漢稍長亦薄遊客死氏撫幼孫守敗屋常空腹年八十餘嘉靖丙辰年饑餓而死

生員梁思聰妻張氏平涼人聰早卒氏年二十一家極貧二子俱幼氏誓不他適立志守節女紅自給日不再食初志彌篤苦節貞操五十年萬曆中巡按徐喬遷題請旌表

生員張化龍妻謝氏平涼縣人夫痼疾氏侍湯餌唯謹至溺矢狼藉牀褥間日爲拭浣三年終無倦色夫久病多恙稍不慊意卽大詬氏婉詞謝之夫死三日歛畢是夕縊死於柩前

朱朗斬妻孫氏平涼縣人夫亡遺子海山方數歲氏託之翁姑七日不食未死以刀自剄遂同穴葬

生員朱復初妻張氏平涼縣人夫亡氏守節撫子璟越入庠李自成攻陷城大肆劫掠氏自度孤孀恐或

古風通志 卷四十二
見逼遂投井死其子璟尅亦從死烈婦孝子人皆哀之

楊自有女孝姐平涼縣人明末流賊猝至父母俱逃散孝姐以汚泥塗其面匿薔薇叢中賊搜得脅之行大罵不從而死

教諭黃錦妻李氏崇信人錦卒氏二十六歲撫遺孤彥相守志涇州何某從其父求婚氏告父曰生則與夫配死當全節擲以熾湯何愧遁靈臺李某亦聞其賢從其兄求婚適歲凶兄以餓死懼之對曰死則死耳涕泣峻辭閉門不納其兄鄉黨聞之莫不肅敬

學生黃彥相妻李氏崇信人夫死守節亦如其姑督學姜表其賢曰一門雙節

教諭梁自立妻蒲氏崇信人遇難避匿山窟賊攻執之氏不受辱賊持刃脅從氏罵不絕口遂遇害

貢生梁毓龍妻關氏崇信人蒲氏之媳也寇至病不及避方著禮服持繩自縊爲賊所阻賊惜其姿色不忍加害怒罵不休堅意求死賊殺之

趙存謨妻關氏崇信人謨卒霜操自矢遺子國掄訓

誨備至卒底成名

劉三重妻劉氏崇信人三重邁篤疾病不可忍暗投崖下氏覺亦號泣投崖夫婦同死觀者如堵

庠生馬若豸妻關氏崇信人豸卒甘貧守節撫子成立

張國珍妻朱氏崇信人國珍被寇掠三年未還氏茹苦自守母與叔謀令他適已與某姓定聘氏泣曰媳去誰事姑且兒歸柰何況子尙孩提耶執不應母迫促之氏度不可回乃給母曰母命不敢違然嫁時衣裳須檢點也遂入室縊死

生員薛銓妻閻氏華亭人隴州鴻臚閻仲容女也識古訓有家風事姑甚執婦道銓早死氏年二十九哀毀甚誓不他適家室匱乏艱辛撫孤成立年七十餘卒

柴安慶妻李氏華亭縣人安慶早死無子氏孤苦守志食貧五十餘年壽八十卒

辛永康妻劉氏華亭人生子女各一永康家貧典史冷霖困楚之歸匿窖中自縊氏甘貧守節撫養子女

古肅通志 卷四十二
雖昆弟未嘗言笑每耕耘使子伺道無行人乃適田
紀言妻李氏華亭人產未彌月流寇陷城一賊入其
家欲污之氏給賊近牀以切麪刀斫死後數賊入殺
氏碎其尸

知縣石起鳳妻趙氏華亭人流賊陷城恐爲所污潛
入南察院自縊死

生員潘雲霄女潘烈女華亭人未出閨流賊逼之投
井而死賊見者並爲垂涕

王永紹女王烈女華亭人甫笄未出閨寇陷城執之
女大罵不絕賊怒加捶楚女罵愈厲以首觸石尋見
殺

知縣馬選魁妻陳氏華亭縣人崇禎七年魁赴京謁
選氏聞賊警攜幼子與侍兒匿石渠山谷中賊尋陷
城執其僕問主母所在脅與至匿所索數日甚急陳
氏知不免乃以子付侍兒藏短刃出給賊曰若欲吾
從幸勿傷吾子行至蕭氏莊逼之陳氏瞋目厲罵遂
出刃自刎而死賊相顧駭愕去事聞勅旌其節贈孺
人

李廷璧妻張氏鎮原人年二十喪夫守志撫孤卒年八十

李時暢妻黃氏鎮原人夫應貢卒於京氏年二十攜子扶柩歸守節四十餘年

生員范孟堅妻王氏鎮原人少年喪夫無子守志終身巡按表其門

段應試妻張氏鎮原人年二十孀居家極貧親黨屢逼改適氏輒以死拒之守志撫孤二子俱成立年七十餘終

生員段大章妻董氏鎮原人年三十夫亡哭泣殞身巡按范立朝上聞建坊旌表

張世龍妻戴氏鎮原人年二十四孀居守節不渝卒年八十

生員段徽妻張氏鎮原人年二十餘夫故晝夜哀泣水粥不下咽者五日食苦杏仁數粒而死

馮宣妻趙氏固原州人年二十三而寡家貧守節撫育幼子壽八十四

彭珏妻楊氏固原衛人年二十四而寡家貧誓死自

守壽七十七

黃淮妻夏氏固原衛人年二十四生二子未周月淮亡氏撫遺子養舅姑姑憫其孤窮欲嫁之氏以死自誓爲女工以給養壽七十三

梁輔妻王氏固原衛人年二十三輔亡有二子在襁褓備歷艱苦勤女工以養姑育子凡五十餘年鄉人重之壽八十三

生員趙欽妻葉氏固原人年二十五欽卒遺二子甫三歲氏撫養劬勞備歷艱辛雖親戚邀請亦不往

百戶陳琮妻郭氏固原衛人琮戰沒氏年二十四撫孤源嗣官壽八十三旌表其門

生員翟元妻白氏固原衛人年二十五元亡貧苦撫遺孤成立鄉里稱賢壽六十三

生員周繼妻張氏固原人繼沒氏年二十五撫育幼子有司表之

生員徐效妻張氏固原人效歿氏年二十七鞠育二子咸成立壽八十有四有司表之

李子友妻溫氏固原州人子友歿氏慷慨以殉時年

二十四天啓中旌表

景可樂妻李氏固原州人可樂以疾卒氏哀傷死

單養棟妾趙氏固原州人養棟死氏方十有九歲夜
殉柩前

韓杞聘妻徐貞女固原州人受應襲韓杞聘未合
而杞殤女聞之潛自經死

生員魏宗一妻趙氏涇州人氏年十八生子僅三月
夫亡誓與夫同死或勸之撫遺孤卒成人寡居四十
餘年

雷秀貞涇州人年十八家貧採蔬于野惡少辛添禮
方鋤逼而求通女叱號力拒以蔬刃刺禮禮反鋤擊
女頸垂絕而逃女父執禮聞巡按吉澄論禮死而表
女門

進士楊重妻毛氏靈臺人重早喪氏方盛年育一男
一女撫養教訓有方女適解元劉鉞男森爲廩生皆
先氏而卒艱難辛苦節操愈勵年八十一歲卒人無
間言

舉人史詳妻閻氏靈臺人詳亡時氏年二十餘守節

終身人常曰父死於忠女終於節父子皆無悔焉

習文妻楊氏靈臺人夫故氏方二十歲守節事姑舅朝夕匪懈撫遺孤耕讀繼業甘貧固守年七十有五艱苦備歷

張企和妻姚氏靈臺人年二十三歲夫故孀居六十四年善事舅姑撫育幼子享壽九十卒事聞旌表

習良民妻陳氏靈臺人年二十夫故家貧有求娶者輒縊幾死事姑楊氏躬持巾櫛及沒氏哀痛泣血殯葬盡禮撫孤子成立年七十有三艱難苦楚老而彌

堅按院題請旌表

生員盧閣妻王氏靈臺人夫卒氏二十一歲事翁姑育幼子饑寒備經始終無渝

生員苟士元妻胡氏靈臺人士元以應鄉試暴卒氏號哭日夜不息親隣勸諭方進飲食遺二子長亦卒其翁姑垂白晨昏侍養無少怠及歿哀毀切痛聞者稱嘆事聞旌表

呂九功妻李氏靈臺人嫁踰年夫故遺腹三月氏卽矢志誓不再適撫養孤子奉侍老姑年八十視膳問

寢日夕不懈嘗涕泣祝曰姑幸無恙兒長爲呂家後夫其有知庶瞑目乎

彭水令姚惟競妻李氏靈臺人氏及笄于歸遂值姑喪孝謹盡禮前氏遺子氏撫養愛逾已出相夫宦所聞有鞭扑之聲氏卽溫言勸之夫卒氏方盛年矢志苦守閨闈矜式

王氏靈臺人王養貴女適隴州民未一月因元宵節歸寧被流賊掠去執刀挾制之氏涕泣罵詈強奪賊刀並撲崖求斃賊感其節烈釋之氏歸父家以爲身雖全節手已受辱適其夫至氏佯慰之卽於是夜自縊

貢生李思芳妻董氏隆德人芳卒氏誓必死遂不食七日卒

多烈女靈臺庠生多蓋臣之女因父早卒未及聘嫁明末流寇攻掠城邑女避於隱形山北窰窰內被賊搜山獲之見其姿艾昇之馬上女不從躍投地下者三次賊以美言誘之女兩手遮面罵不絕口賊怒遂斷其手而殺之

曹椒葉靜寧州人曹福女生而端莊不輕言笑工女紅暇則其父教以列女傳許配王守正未嫁而守正死曹氏聞之懼再婚不食而死

生員吳應正妻党氏靜寧州人爲女時父党禮病目痛不能忍欲自盡氏多方防救哀毀幾絕延醫調治有人謂曰欲目明須以人肉食之氏潛入室舉刀割股烹羹以進父食之其目果愈人咸以爲至孝所感知縣馬應麟妻婁氏靜寧州人年二十五夫亡守志每撫二子泣曰非汝輩我當從爾父於地下矣後子

成立壽八十六

監生周塘妻沐氏靜寧州人年二十二夫故氏毀形自誓茹苦守志每撫孤泣曰須爾成立爾父始瞑目九原矣後子成人氏壽八十

監生張璇妻陳氏靜寧州人年二十四守節孝事翁姑遺孤甫三齡鞠育成立卒年八十三

貢生方向妻唐氏靜寧州人向卒遺四子氏年二十七守節教子常泣責諸子曰爾等無成我何顏見爾父地下子皆悲憤勵志鄉貢者二人長應規知楚雄

縣事仲應矩任崞縣簿卒年八十有六

學博李淳妻王氏靜寧州人居水洛城值寇變賊入其室挾氏欲亂氏怒罵拒之賊益逼氏投井而死
生員邵騰鳳妻霍氏靜寧州人崇禎七年流賊突入莊舍氏被執忿罵頭觸石死

監生杜汝楫妻朱氏莊浪縣人年十九楫亡舅姑在堂遺孤良琨幼氏哀毀幾絕尋悟托孤重於死節乃矢志養親撫子後琨爲崞縣簿甚孝守節五十餘年
貢生楊文英妻岳氏莊浪人英卒氏年二十有五嫠居逾五十年撫孤從學官典膳

蒙冠妻蔣氏莊浪人冠亡氏年二十一誓不獨生時姑尙在遺孤在抱諸親勸諭至再方起乃竭力奉姑撫孤成立孀居五十餘年六十六卒

杜繼美妻崔氏莊浪人明末流寇入其莊舍欲犯之抗節不屈罵不絕口竟遇害

王篤妻莊浪人失氏明末流賊入莊欲污之氏遂假事誑賊稍寬竟投崖死

進士齊廷珪妻張氏隆德人珪卒氏產一子在襁褓

中時年十九常慮爲家人所逼防禦甚固卒撫孤成立終其身

同知楊文奎妾劉氏隆德人文奎卒氏年二十七家人勸其更適氏以死自誓遂撫孤終身年八十三卒同知齊恩妾張氏隆德人恩戰死氏年二十六痛其夫沒于王事而孤未成立遂以死自守撫其子終身生員剡英妻王氏隆德人英亡氏年二十六泣曰吾誼當從死但無如遺孤何耳遂撫子就學後子亦成諸生鄉人畢賀王感鬱成疾泣曰吾極知可喜顧恫廼父不見以此鬱鬱不能自解耳疾遂不起卒

生員劉鉞妻靳氏隆德人鉞亡氏年二十八遺孤甫一歲貧甚靳撫其孤艱苦五十餘年

生員劉棟妻辛氏隆德人棟卒氏年十八棟上有父母遺孤二在襁褓中氏泣曰父母饑寒嗣續存滅盡在我身遂矢死自守奉養翁姑撫育二子人無間言後二子俱成立氏年九十卒

生員李成梁妻閆氏隆德人梁卒氏年十九遺一女哀毀殆將滅性遂成疾父母致醫藥不肯服曰第恐

不得死耳臨絕瞪目顧家人曰得死所矣語訖目瞑
生員閆汝化妻王氏隆德人夫卒氏哭泣晝夜不絕
兩目遂瞽成疾積數月病革氏有一子呼之曰吾今
得從爾父地下遂卒時年二十

生員趙應科妻范氏隆德人夫卒遺孤年十三氏哀
毀不食家人勸曰此子與爾爲存亡者也撫孤與狗
死孰重氏悟遂強飯卒撫其子獲成立

許登海妻張氏隆德人家甚貧登海死氏年二十九
採薪拾馬矢炊糠覈而啖之夏日冬夜不免凍餒
居三十餘年卒

閆榮妻董氏隆德人榮卒氏年二十九無子寡居四
十年備嘗艱辛苦節

生員雍學易妻孫氏隆德人易卒有老母遺子纔三
歲氏備極艱難事姑色養撫成其子年七十八卒

武生王信妻董氏隆德人信卒氏年二十五奉翁姑
育幼子翁姑歿質衣市殯葬物遺孤獲成立氏年踰
七十卒

杜老女隆德人杜曰山女曰山老無子家甚貧同縣

民梁宰求聘女爲妻父將許之女曰父母老無子止一女女嫁父母曷依自誓終身不嫁拮据力作以養父母父卒營葬畢復竭力養母越十八年母卒營葬畢女遂曰吾已許父母不嫁矣今復嫁是渝言也且父母墳墓何託乎終不嫁煢苦自守年踰七十卒鄉人感其孝呼曰老女

真陽令董三秦妻子氏隆德人三秦爲宰多有惠政氏多從內贊成之三秦卒氏寡居四十年撫教三子俱以明經入仕有司疏其節行詔縣給米歲十二石綿布歲十二斤終其身

王歷妻董氏隆德人真陽令三秦女崇禎七年賊犯隆德城破氏率二女同赴池溺死三日尸浮出顏面如生

段烈女隆德人父遇科字同縣李氏崇禎八年爲賊所執堅守不可犯賊逼之齧其左臂力拒之賊怒刃殺之時年十六

雍烈女隆德人父鳳鳴賊克縣獲之女堅執不從賊手刃殺之

監生方大儒妻雍氏隆德人儒卒氏持節自守賊犯隆德城陷自縊死

生員張士俊妻齊氏隆德人明末賊克城氏從士俊並三子俱赴井溺死

何自新妻仇氏靜寧人賊至自縊死

賈德友妻陳氏靜寧人寇掠罵賊剖腹而死

皇清姚永福聘妻何氏平涼縣人同鄰婦採苦于野田進禮見氏少艾乘其空野強拉求姦何氏堅拒叫罵抓裂進禮面貌進禮用掀靴擊何氏頂心仆地殞命何氏因強姦不從被殺康熙三十七年具題

旌表

王應亨妻沈氏平涼縣人應亨遠出有生員郭鍾者排入其室戲誘之沈變色正詞叱之郭懼出沈遂自縊死雍正二年具題

旌表

紀成妻閔氏平涼人甫婚娶王輔臣叛爲賊逼投崖落崖半樹稍未墜賊退援之三日始甦年二十一夫死遺腹八月生子辛苦鞠育成立壽七十八

古肅通志 卷四十二
祁化普妻崔氏平涼人年二十五夫死歷盡辛苦背糞壅田養姑撫子普係庶出兄屢逼嫁暗通媒妁欲強娶氏以死相拒而免

貢生連泰拔妻王氏平涼人明末流寇犯境拔中矢斃氏年十八子甫週歲苦節自甘流離顛沛無渝志年八十餘而終

生員陳志妻王氏平涼人志故王年二十三歲產遺腹子助備極艱辛撫養成人年八十二而終

生員賈文煥妻張氏鎮原人年二十八歲夫故守節事姑養生送死無憾撫遺腹子成立雍正二年具題

旌表

生員段淑古妻賈氏鎮原人二十五歲夫亡未有子女氏守節奉姑曲盡孝道歷二十八年姑歿喪葬盡禮雍正十年具題

旌表

脫海龍妻趙氏鎮原人遇兵避趨崖窟海龍後奔氏遙望見夫爲追兵手刃仆地遂投崖而絕土人憐之立石碣於道旁

王弘綱妻柴氏固原州人年二十二夫亡撫孤守節
歲遇荒歉日不舉火以死自守守節三十一年孝養
翁姑撫二孤成立康熙十六年具題

旌表

生員趙國寧妻尙氏固原州人夫亡氏年二十八孝
事翁姑後相繼逝世喪葬盡禮撫子成立壽九十三歲
康熙五十年具題

旌表

馬志啓妻李氏固原州人啓故氏年二十二欲自絕
念翁姑在堂堅志毀形守節雍正三年具題

旌表

段氏固原州人因夫兄陳大年自外醉歸見其弟在
書館歇宿逕奔段氏卧房求合段氏拒罵大年掌擊
棍毆殞命投屍井中將陳大年擬斬段氏強姦不從
以致身死雍正九年十二月具題

旌表

黎天祿妻吳氏固原州人天祿亡氏年二十六持刀
自刎官立石表之曰白刃明心殺身成仁

吳承恩妻韓氏固原營守備韓寧女姑病刲股和藥以進疾竟瘥

功加守備文理妻王氏固原州人文理於雍正七年出征巴里坤至十年七月二十七日在軍營病故十一月攜骨回里王氏聞訃悲號卽欲捐生因防守嚴密於是月二十三日賺母歸爨投繯自盡

生員楊嘉珩妻柳氏固原州人珩疾篤氏以死許珩及卒家人共防之氏衣麻衣三日悲戚不甚防稍踈氏潛自縊年未滿二十

生員李瀛妻于氏涇州人年二十四喪夫守節撫孤成立

儒童李永綦妻閻氏涇州人氏年二十五綦亡撫週歲孤兒苦節六十餘年

蘓氏涇州民婦王輔臣叛逆平涼氏與李氏俱被兵虜臨崖遇水投河而死

李氏涇州民婦與蘓氏被兵掠相繼溺水死州牧聞豎碑表二氏墓

莊邑生員劉瑄妻夏氏靜寧州人夫卒無子氏年二

十六歸母家守節會父兄繼逝養母撫姪終身無二志

生員王傳妻王氏靜寧州人與張氏同被兵掠拘於一室經一索死

常能妻張氏靜寧州人同王氏死時被拘者尙多惟二氏懼汚自經

莊浪縣庠生張標妻楊氏靜寧州人王輔臣之亂氏被兵獲欲汚之堅拒不從自刎而死

賈德友妻陳氏靜寧州人罵賊剖腹

生員楊盛業妻李氏莊浪人盛業死氏年十九欲殉之因前妻遺二幼子撫孤守節至老不改

生員張爾紳妻齊氏隆德人年二十七夫亡遺二幼子家貧翁老荒歲絕糧旬日不能舉火以豆渣充饑族人欲奪其節死爭得免葬翁教子歷盡艱苦年七十五歲

杜偉妻程氏隆德人年十八夫亡泣欲從死遺腹三月後生子食貧撫誨年六十一

董福妻高氏靈臺人二十喪夫孝養翁姑值逆賊爲

寇兼歲饑能以禮送葬子方週歲撫訓成立
 生員張大倫妻吳氏鹽茶廳人上事孀姑極盡孝養
 氏年十九甫生一子未朞夫歿家道貧寒勤苦紡織
 撫子長成屏跡家居並不出外守節五十餘年始終
 如一雍正三年具題

旌表

甘肅通志卷之第四十二
 終

